

Los ntawm Thawj Tswj Hwm  
Henry B. Eyring

Tus Pab Cuam thib Ib hauv Thawj  
Pawg Thawj Tswj Hwm



# Nws Twb Sawv Lawm

Ib zaj lus tim khawv txog qhov tseeb ntawm Yexus Khetos txoj Kev Sawv Rov Los yog ib lub hauv paus ntawm kev cia siab thiab kev ntxeem mus tom ntej. Thiab yeej ua tau li no rau Vajtswv ib tug me nyuam twg. Thaum lub Rau Hli Ntuj xyoo 1969, kuv niam tau tso lub neej no tseg, thiab txij thaum ntawd tau muaj ntau xyoo, thiab yuav muaj ntau ntxiv mus txog thaum kuv rov qab ntsib nws.

Qhov uas kuv tu siab vim yog kuv niam wb sib ncaim rau ib ntu los pauv mus ua kev zoo siab. Yeej yog ntau tshaj qhov uas cia siab tias yuav rov qab sib ntsib dua ib zaug ntxiv. Vim tus Tswv tau muab ntau yam tshwm sim los dhau ntawm Nws cov yaj saub thiab vim tus Vaj Ntsuj Plig Dawb Huv tau ua tim khawv pom zoo rau qhov tseeb txog txoj Kev Sawv Rov Los rau kuv, kuv pom tau hauv kuv lub paj hlwb saib yuav zoo li cas thaum peb rov qab ntsib cov neeg uas peb hlub uas tau sawv rov los thiab txais tej cev dawb huv lawm.

“Cov no yog lawv cov uas yuav sawv tawm los hauv cov neeg ncaj ncees txoj kev sawv rov los. . . .

“Cov no yog lawv cov uas muaj npe sau tseg hauv lub ntuj ceeb tsheej, qhov chaw uas Vajtswv thiab Khetos yog ob tug txiav txim rau tib neeg sawv daws.

“Cov no yog lawv cov uas yog cov neeg ncaj ncees uas rais los mus ua neeg zoo tag nrho dhau ntawm Yexus tus tus cev lus rau txoj kev khi lus tshiab, nws yog tus uas tau theej txhoj zoo tag nrho thaum nws txo nws roj nws ntshav” (D&C 76:65, 68–69).

Vim Yexus Khetos kov yeej txoj kev tuag, tag nrho cov me nyuam ntawm Leej Txiv Saum Ntuj Ceeb Tsheej uas yug los rau hauv lub ntiaj teb yuav sawv rov los muaj ib lub cev uas yuav tsis txawj tuag mus ib txhis li. Ces kuv zaj lus tim khawv thiab nej cov lus tim khawv hais txog qhov tseeb zoo kawg yuav daws tau qhov mob siab uas muaj vim yog peb ib tug kwv tij neej tsa los yog peb ib tug phooj ywg tso peb tseg es muab qhov kev tu siab ntawd pauv mus ua kev zoo siab tos ntsoov hnuv rov qab sib ntsib thiab ua ib lub siab xav npaj rau hnuv ntawd.

Tus Tswv tau muab lub txiaj ntsim ntawm txoj kev sawv rov los pub rau peb txhua tus, es vim yog li ntawd peb tej ntsuj plig thiaj yuav nyob hauv tej lub cev uas zoo tag nrho (saib Alma 11:42–44). Kuv niam yuav yog ib tug neeg hluas thiab ci ntsa iab, es tsis muaj tej cim uas qhia tias nws laus lawm los yog tau raug txom nyem ntau npaum li cas ntxiv li lawm. Qhov ntawd yuav los rau nws thiab rau peb ua ib lub txiaj ntsim.

Tiam sis peb cov uas muaj lub siab xav nrog nws nyob mus ib txhis li yuav tsum xaiv ua tej yam uas yuav cia peb tsim nyog nrog nws koom nyob ua ke, ua neej nyob rau ntawm qhov chaw uas Leej Txiv thiab Nws Tib Leeg Tub uas tau sawv rov los nyob muaj yeeb koob. Qhov chaw ntawd yog tib qho chaw uas tsev neeg nyob tau mus ib txhis li. Ib zaj lus tim khawv hais txog qhov tseeb ntawd tau ua rau kuv haj yam txiav txim siab kom kuv thiab cov neeg uas kuv hlub ua neeg

tsim nyog nkag mus rau hauv lub nceeg vaj xilethi-aus dhau los ntawm Yexus Khetos txoj Kev Theej Txhoj kev pab hauv peb lub neej (saib D&C 76:70).

Tus Tswv muaj ib qho kev coj rau peb txoj kev nrhiav kom tau lub neej nyob mus ib txhis li nyob ntawm ob zaj lus thov Vajtswv rau lub cim nco txog uas pab kuv thiab pab tau nej thiab. Ob zaj lus ntawd caw peb rov qab khi cov lus uas peb khi thaum peb ua kev cai raus dej tshiab hauv txhua txoj kev sib ntsib noj lub cim nco txog.

Peb cog lus tias peb yeej yuav nco qab ntsoov tus Cawm Seej. Cov cim ntawm Yexus txoj kev txi pab peb saib tau tus nqi loj uas nws them kom kov yeej txoj kev tuag rau nqi, muaj kev hlub tshua rau peb, thiab zam txim rau peb yog tias peb yuav xaiv los hloov siab lees txim.

Peb cog lus kom ceev Nws tej lus txib. Qhov uas peb nyeem cov vaj lug kub thiab cov yaj saub cov lus thiab mloog cov lus hais hauv peb tej kev sib ntsib noj lub cim nco txog pab peb nco txog peb cov lus khi tseg kom ua li ntawd. Tus Vaj Ntsuj Plig Dawb Huv pab peb nco qab txog tej lus txib tseem ceeb tshaj uas peb yuav tsum ceev rau ib hnuv twg.

Nyob hauv ob zaj lus thov Vajtswv rau lub cim nco txog, Vajtswv cog lus tias Nws yuav xa tus Vaj Ntsuj Plig Dawb Huv los nrog peb nyob nraim (saib Moroni 4:3; 5:2; D&C 20:77, 79). Kuv pom tau tias thaum lub sij hawm ntawd Vajtswv xam phaj tau kuv. Vajtswv ua rau kuv paub hais tias kuv tau ua tej yam dab tsi uas ua rau nws zoo siab, thiab saib kuv yuav tsum hloov siab lees txim li cas, thiab tej npe thiab tej tug neeg uas Nws xav kom kuv sawv cev rau Nws mus pab.

Tau ntau xyoo los lawm, qhov uas pheej muaj li ntawd tau muab kev cia siab pauv mus ua tej kev siab hlub thiab qhov paub tseeb hais tias kuv txais tau kev hlub tshua thiab kev zam txim vim yog tus Cawm Seej txoj Kev Theej Txhoj thiab Kev Sawv Rov Los.

Kuv ua tim khawv tias Yexus yog tus Khetos uas sawv rov los, peb tus Cawm Seej, thiab peb tus yam

ntxwv zoo tshaj plaws thiab tus uas yuav coj peb mus rau lub neej nyob mus ib txhis li.

---

## QHIA LOS NTAWM TSAB XOY NO

Peb yuav tsum “muab tag nrho tej vaj lug kub coj los piv rau peb, es kom nws thiaj muaj nqis rau peb thiab peb thiaj kawm tau” (1 Nifais 19:23). Sim xav saib puas tsim nyog nyeem ob zaj lus thov Vajtswv foom koob hmoov rau lub cim nco txog, uas muaj nyob hauv Doctrine and Covenants 20:76–79. Tom qab nyeem Thawj Tswj Hwm Eyring cov lus qhia txog ob zaj lus thov Vajtswv foom koob hmoov rau lub cim nco txog, tej zaum koj yuav xav caw lawv cov uas koj tab tom qhia los xav txog saib ob zaj lus thov Vajtswv no yuav ua li cas coj lawv lub neej thiab pab lawv rov qab mus nrog Leej Txiv Saum Ntuj thiab Yexus Khetos nyob ua ke dua ib zaug ntxiv.

## COV HLUAS

### Koj txoj Kev Xam Phaj nrog Vajtswv

**T**hawj Tswj Hwm Eyring qhia hais tias thaum peb ua tib zoo mloog ob zaj lus thov Vajtswv foom koob hmoov rau lub cim nco txog, peb xav tau hais tias Vajtswv tab tom xam phaj peb txhua tus. Thawj Tswj Hwm Eyring xav txog peb yam nram qab no. Sim xav saib puas tsim nyog sau cov lus nug nram qab no hauv koj phau ceev xwm txheej thiab xav txog cov lus nug no txhua hnuv caiv lub hli no. Thaum koj xav txog thiab txais kev tshoov siab los ntawm tus Vaj Ntsuj Plig Dawb Huv txog tej no, koj kuj sau tau txog tej kev tshoov siab ntawd hauv koj phau ceev xwm txheej thiab.

- Kuv tau ua dab tsi uas yog ua raws li Vajtswv lub siab nyiam?
- Kuv yuav tsum hloov siab lees txim los yog thov kom tau kev zam txim txog dab tsi?
- Vajtswv xav kom kuv ua hauj lwmm pab leej twg?



# Tej Kev Khi Lus hauv lub Tuam Tsev

*Ua tib zoo thov Vajtswv kawm tej yam no thiab, thaum tsim nyog ua, sib tham txog tej no nrog cov viv ncaus uas koj mus xyuas. Siv tej lus nug no pab koj txhawb koj cov viv ncaus lub zog thiab ua kom lub Koom Haum Niam Tsev muaj feem hauv koj lub neej. Kom tau ntaub ntawv xov xwm ntxiv, cia li txuas rau [reliefsociety.lds.org](http://reliefsociety.lds.org).*

**Kev Ntseeg, Tsev Neeg, Kev Pab**

**T**ej kab ke cawm neeg txoj sia uas yus txais hauv lub tuam tsev yuav cia peb ua ib tse neeg rov qab mus nrog peb Leej Txiv Saum Ntuj Ceeb Tsheej nyob ua ke thiab yuav txais tej koob hmoov thiab hwj chim uas los saum ntuj los thiab tsim nyog peb siv zog ua hauj lwm thiab txi txhua yam kom peb tau tej no,”<sup>1</sup> Thawj Tswj Hwm Thomas S. Monson hais. Yog tias koj tseem tsis tau mus hauv lub tuam tsev, koj npaj tau txais tej kab ke dawb ceev hauv lub tuam tsev thaum koj:

- Ntseeg rau ntawm Leej Txiv Saum Ntuj Ceeb Tsheej, Yexus Khetos, tus Vaj Ntsuj Plig Dawb Huv.
- Nrhiav kom tau ib zaj lus tim khawv txog Yexus Khetos txoj Kev Theej Txhoj thiab txoj moo zoo uas muab txum tim rov qab los lawm.
- Txhawb nqa thiab ua raws li tus yaj saub uas muaj sia nyob tam sim no.
- Ua neej tsim nyog txais ib daim ntawv tso cai nkag tuam tsev thaum koj them nyiaj ib feem kaum, ua neeg dawb huv, ua neeg siab zoo, ceev Lo Lus Txawj Ntse, thiab ua neej raws li lub Koom Txoos tej lus qhia.
- Muab sij hawm, txuj ci, thiab nyiaj txiag kom pab txhim tsa tus Tswv lub nceeg vaj.
- Pab ua tej hauj lwm tshawb nrhiav peb tsev neeg zaj keeb kwm.<sup>2</sup>

Thawj Tswj Hwm Monson qhia ntxiv hais tias, “Thaum peb nco qab ntsoov tej lus uas peb khi tseg hauv [lub tuam tsev], peb haj yam yuav ntseem mus kom dhau txhua txoj kev sim siab thiab txhua kev haub ntxias.”<sup>3</sup>

## **Los ntawm cov Vaj Lug Kub**

Doctrine and Covenants 14:7; 25:13; 109:22

## **Los ntawm Peb zaj Keeb Kwm**

“Ntau tshaj 5,000 Tsoom Haiv Neeg Ntseeg sib sau ua ke rau ntawm lub Tuam Tsev Nauvoo tom qab tau muab nws fij tseg rau Vajtswv. . . .

“Qhov dag zog, lub hwj chim, thiab tej koob hmoov ntawm tej kev khi lus hauv lub tuam tsev [txhawb nqa] Tsoom Haiv Neeg Ntseeg thaum lawv taug kev mus [rau sab hnuv poob], thaum lawv [nyiaj] qhov no no, qhov sov sov, qhov kev tshaib plab, kev pluag, kev mob kev nkeeg, kev xwm txheej, thiab kev tuag.”<sup>4</sup>

Ib yam li coob tug viv ncaus hauv lub Koom Haum Niam Tsev, Sarah Rich ua hauj lwm hauv lub tuam tsev. Nws hais txog tej yam uas tau muaj los rau nws: “Yog tias tsis tau muaj kev ntseeg thiab kev txawj ntse uas peb tau txais hauv lub tuam tsev ntawd los ntawm . . . tus Tswv tus Ntsuj Plig, peb

txoj kev taug kev yuav zoo nkaus li peb dhia mus hauv ib lub qhov tsaus ntuj nti. . . . Tiam sis peb muaj siab ntseeg rau ntawm peb Leej Txiv Saum Ntuj Ceeb Tsheej, . . . xav tias peb yog Nws cov neeg uas Nws xaiv tseg lawm . . . , thiab peb tsis muaj kev tu siab, peb xyiv fab vim yog peb hnuv cawm seej tau los lawm.”<sup>5</sup>

Rau cov poj niam ntawm Tsoom Haiv Neeg Ntseeg mas qhov kev khiav dim tsis yog “dhia mus rau hauv qhov tsaus ntuj nti”. Lawv tej kev khi lus hauv lub tuam tsev txhawb nqa lawv.

## **LUS CIM**

1. Thomas S. Monson, “The Holy Temple—a Beacon to the World,” *Liahona*, Tsib Hlis Ntuj 2011, 92.
2. Saib *Daughters in My Kingdom: The History and Work of Relief Society* (2011), 21.
3. Thomas S. Monson, *Liahona*, Tsib Hlis Ntuj 2011, 93.
4. *Daughters in My Kingdom*, 29–30.
5. Sarah Rich, hauv *Daughters in My Kingdom*, 30.

## **Kuv Yuav Pab Li Cas?**

1. Kuv puas mus pe hawm tom lub tuam tsev ntshawv ntshis?
2. Kuv puas yaum kom kuv cov viv ncaus txais tej koob hmoov ntawm lub tuam tsev?

© 2013 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub txhais ua lus As Kiv: 6/12. Pub txhais ua lus Hmoob: 6/12. Kev txhais *Visiting Teaching Message*, April 2013. Hmong. 10664 295